

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ara o te vare noa outou i te paari hape, e te haavare faufaa ore a te hoê atu taata, na roto i te parau tutuu a te taata nei, ma te au i te mau peu o teienei ao, te ore râ e au i te haapiiraa a te Kirito." Kolosa 2: 8.

Nu. 12.

10 Setepa, 1911.

Mat. 4.

Te Ravea Tia Mau no te Bapetizoraa.

¶ E na ô maira te vea Katorika i te avae Tiurai i mairi a'enei:

"Te mârô noa maira te Momoni e, hoê noa iho ravea tia mau e oti ai te papetitoraa mau, oia hoi te Utuhiraa, ma te faahapa'tu i te mau ravea êê, oia hoi te Niniiraa e te Pipiraa. Teie atoa te tahi mârôraa o ratou ra, maori râ to ratou tiaturiraa i te papetitoraa a Ioane. Teie â te tahi, oia hoi eiaha te tamarii ia papetitohia."

Te tiaturi nei matou i te parau i te na ôraa e: "E oti a'era Iesu i te bapetizohia, haere maira oia i nia mai raro mai i te pape." Mataio 3: 16. Oia atoa i te parau i te na ôraa e: "E haere atura raua i raro i te pape, o Philipa e te eunuka atoa ra, e bapetizo atura oia ia'na. E tae maira raua i nia mai raro mai i taua pape ra." Ohipa 8: 38, 39. Ei faatiaraa papu roa ia te reira na parau e piti nei i to matou mârôraa e, hoê noa iho ravea tia mau ra no te bapetizo, e aita'tu, oia hoi te ravea bapetizoraa utuhi. Na ô maira te vea Katorika:

"Eaha ia? Ua papu anei e, ua haapao o Ioane i te ravea utuhiraa? Ua papu anei e, ua papetitohia te eunuka i te ravea utuhiraa? No teie

nei parau i te na ôraa e: 'i nia mai raro mai i te pape'? Aita roa'tu ia, aita roa'tu i faahitihia i reira te parau utuhi, hopu. Te vahi e tahe ai te mau anapape, e vahi popoo ia i paôhia e te pape; e no reira te taata tei haere i te pape, ua haere ia i raro, e ia haere mai i nia i te pae, ua haere mai ia i nia mai raro mai i te pape."

Te tamata noa nei te Katorika i te ruri ê te auraa mau o te parau i te na ôraa e: "E oti a'era Iesu i te baptizohia haere maira oia i nia mai raro mai i te pape." Aita râ ta'na parau i manuia. Na ô faahou maira oia:

"Te vahi e tahe ai te mau anapape e vahi popoo ia, i paôhia e te pape, e no reira te taata tei haere i te pape, ua haere ia i raro, e ia haere mai i nia i te pae, ua haere mai ia i nia mai raro mai i te pape."

E hi'opoa rii tatou i taua parau nei, eiaha e ru, e feruri râ. E vahi popoo ia te vahi e tahe ai te mau anapape, e te taata ra tei haere i te pape, ua haere ia i raro i te pape, oia hoi ua tae oia i te hiti pape, e ia tae mai i nia i te pae ua tae mai ia i nia mai raro mai i te hiti pape. Ia haere râ na taata toopiti, mai ia Iesu raua o Ioane, i te pape, ua haere roa raua i roto i te pape, ahiri aita râ, aita roa ia e ravea ia haere maira Iesu i nia mai raro mai i te pape, ia oti i te baptizohia. E haere maira râ oia i nia mai raro mai i te hiti o te pape. Aita râ te reira parau e au, no te mea, na ô hoi tei papahia ra: "Haere maira oia i nia mai raro mai i te pape." Eiaha i te pae pape, eiaha atoa i te hiti pape, i te pape râ. Aita roa'tu e ravea ia haere maira te tahi mea i nia mai raro mai i te pape, maori râ ua tae roa taua mea ra i raro i taua pape ra, ei reira ua tia roa ia ia haere maira i nia mai raro mai i taua pape. Mai ta Iesu raua o te eunuka ua haere maira i nia mai raro mai i te pape ia oti raua i te baptizohia i te ravea hoê roa tia mau ra, oia hoi te ravea baptizoraa utuhi. Na ô maira te vea Katorika:

"No nia ra i te faaauraa a Pauro i te papetitoraa i te tanuraa, teie te auraa mau: Te papetitoraa e fanauraa apî ia. Eaha, e roaa mai ai taua fanauraa apî ra? maori râ na roto i te faarueraa (te tanuraa, te auraa) i te hara, oia hoi te taata tahito, te huru matamua. Roma 6. E ere teie tanuraa hara i te utuhiraa."

Ua faaauhia e Paulo i te ravea bapetizoraa i to Iesu tanuraahia, e i te huru o to'na ra tia-faahou-raa. Roma 6: 3-5. Kol. 2: 12. I roto i teie nei pue irava ua haapii papu Paulo i te feia mo'a i te huru o te ravea o to ratou bapetizoraahia, o tei ore roa i haapaohia i te ravea niniiraa e te pipiraa, i te utuhiraa râ, no te mea e ore roa te reira na ravea e au i to Iesu tanuraahia i roto i to'na ra pohe, e ore hoi e au i te huru o to'na ra tia-faahou-raa i nia mai te pohe mai. Area ia bapetizohia tatou i te ravea tia mau ra, oia hoi te ravea utuhi, ia matara ta tatou mau hara; ua au roa te reira i to Iesu tanuraahia, e i to'na ra tia-faahou-raa i nia mai te pohe maira. E i reira ua tanuhia to tatou mau hara, na roto i te bapetizoraa utuhi, o tei au roa i to Iesu tanuraahia e i to'na tia-faahou-raa. Na ô hoi taua vea ra:

“ ‘Ia ore te taata ia fanau faahou i te pape e te varua.’ Ioane 3: 5. Ua parau anei Iesu e: Ia ore te taata ia fanau faahou i te utuhiraa pape? Aita. E pape râ ta'na i parau. Aita ona i faataa i te ravea e tae ai taua pape ra i nia i te taata.”

Eaha te ravea ia fanau mai ai te tahi mea? Teie ia, maori râ ia tupu taua mea ra i roto i te opu o ta'na ra metua vahine, e ia paari râ, ia tae rapae, no roto mai i te opu o ta'na metua vahine e fanau mai ai. Oia atoa te taata ia fanau (bapetizohia) i te pape e tae oia i raro i te pape ia moe roa, mai ta te tamarii, ua moe roa ia i roto i te opu o ta'na metua vahine. Ia bapetizohia te tahi taata i te ravea tia mau ra, oia hoi te utuhiraa, e tae maira oia i nia mai raro mai i te pape e ua au roa ia te reira i te fanauraa tamarii o tei tae mai i rapae mai roto atu i te opu o ta'na metua vahine. Ia ninii e aore ra ia pipi atu i te tahi maa pape i nia iho i te taata, ua au anei ia parauhia e ua fanau oia i te pape? Aita. Ia bapetizohia râ oia i te ravea utuhi, oia hoi ia moe roa i raro i te pape, e ia tae maira oia i nia mai raro mai i te pape, ua tia roa ia ia parauhia e, ua fanau oia i te pape. Aita râ te Katorika i na reira. Te na ô nei te Katorika:

“I te mahana Penetekote i pou mai ai te Varua Maitai i nia i te mau Apotoro, e i haamata'i ratou i te poro haere i te Evanelia, e toru tauatini taata tei papetitohia i Ierusalema, aita hoi e anapape to reira, aita mau i haapaohia te ravea utuhiraa; ei ravea ohie te haapaohia, oia hoi te pipiraa. Ohipa 2: 41.”

Te parau nei te Katorika aita to Ierusalema e anapape. Auê, aita paha oia i ite e, tei Ierusalema te hoê pape hopu, o Beteseda te i'oa, e 60 etaeta i te roa, e 20 etaeta i te aano, e vahi au roa ia no te baptizoraa utuhi. Ioane 5: 1-5. E te vai atura hoi te mau pape tahe i fatata mai ia Ierusalema. Na vai i faaite mai te Katorika e, "Ei ravea ohie te haa-paohia, oia hoi te pipiraa"? Te tamata nei oia ia faatia i te ravea apî pipiraa na roto i to'na ihô mana'o, irava ore, tiaraa ore. Te na ô faahou maira te Katorika:

"Ua papetitohia o Paulo i roto i te fare o Anania." Ôhipa 9: 17, 18. Aita hoi e anapape to reira no te utuhiraa."

Teie ta te irava i faaite mai, oia hoi ua tomo Anania i roto i te fare i parahihia e Paulo, e ua tuu ihora i ta'na rima i nia ia'na, ia faaîhia i te Varua Maitai, e ia ora to'na mata. E ia ite faahou atura oia, ua tia a'era i nia, e baptizohia ihora. Eaha, ua papu anei e, ua baptizohia Paulo i roto i te fare? Aita roa'tu. Ua papu roa râ, ua ora to'na mata, e ua ite faahou atura oia i roto i te fare. Muri iho râ i te reira tia a'era oia i nia. Eaha hoi oia i tia mai ai? Ia baptizohia anei, e aore ra, ia haere oia i te vahi pape, ei reira ia baptizohia e tia'i i te ravea tia mau ra, oia hoi i te baptizoraa utuhi? Te reira ia paha no te mea, ua na ô maira Anania ia'na: "Eaha oe i haamaoro ai? A tia, ia baptizohia oe e horoi ê atu i ta oe mau hara." Ohi. 22:16. E teie atoa te tahi mana'o, ua haere paha oia i te pape ia baptizohia i te ravea tia mau ra, oia hoi te utuhiraa, no te mea tirara'tu ai ravea ta ratou i ite i te reira tau. Teie nei na ravea apî o te Katorika, oia hoi o te niniiraa e te pipiraa o na ravea apî ia i faatupuhia e te taata i te toru o te tene-tere i muri a'e i te Mesia. Na ô maira tau hoa itoitoe e: "Aita e anapape to reira no te utuhiraa." Tei te oire ra o Damaseko Paulo i te nohoraa. E te tahe noa ra te tahi ana-pape rahi na ropu i te oire, o Barada te i'oa, e o tei parau-atoa-hia o Abana. A hi'o i te Mau Arii Piti, pene 5: 12. E au mau hoa taio parau e, eiaha e tiaturi noa'tu i teie nei parau o te Katorika i na ôraa e, "Aita e anapape to reira no te utuhiraa", no te mea, e ere ia i te parau mau. Ua na ô hoi oia e:

"Ua papetito hoi o Petero ia Korenelio e to'na utuafare atoa i roto i te fare. Ôhipa 10: 47, 48."

Te faaite mai taua tau irava nei, ua faaue atura Petero

ia baptizohia ratou i roto i te i'oa o te Fatu. Aita râ te parau i faaite mai ua baptizohia ratou i roto i te fare. E mana'o te reira no to tatou hoa ana'e, eiaha roa'tu râ e haapiiraa i roto i te ohipa a te mau aposetolo. Te na ô faahou nei te Katorika:

"Te taata tiaï fare tapearaa i Philipa, ua papetitohia oia e to'na utua-fare i roto i taua fare tapearaa ra, i te po, e Pauro. Ohipa 16: 33. Aita hoi e ravea ia horo ratou i te anapape i taua po ra ia papetitohia i te utuhiraa."

Te parau nei te Katorika, ua baptizohia te taata tiaï fare tapearaa e to'na utuafare i roto i te fare tapearaa i te po e Paulo. E au mau hoa taïo parau e, e taïo maite outou i na irava mai te 25 e tae noa'tu i te 34. Teie ta te irava 30 i faaite mai: "Ua aratai oia ia raua i rapae (i te fare tapearaa), e ua na ô maira: 'E ta'u pue fatu e, eaha vau e ora'i au nei?' " Irava 33. "I taua hora i te rui ra, ua haapao oia ia raua, e ua horoi atu i to raua iravarava; baptizohia ihora oia e to'na'toa ra fetii i reira ra." Irava 34. "E ia aratai atura oia ia raua i roto i to'na ihora fare, ua faanahonaho ihora i te amuraamaa na raua; oaoa'tura oia e to'na utuafare atoa, i te mea oia i faaroo i te Atua." Teie tei faaitehia mai i roto i teie nei pue irava, oia hoi ua aratai te tiaï fare tapearaa ia raua i rapae, e i taua hora i te rui ra ua horoi atu i to raua iravarava, baptizohia ihora oia e to'na fetii i reira, e ia oti i te baptizohia, ua aratai oia ia raua i roto i to'na iho fare. Teihea te irava o tei faaite mai e, "Ua baptizohia te tiaï fare tapearaa e to'na utuafare i roto i te fare tapearaa i te po e Paulo"? Aita, aita roa ia, e mârô-raa teie no te Katorika i patuhia i nia i te one, e ia hi'opoa-hia râ, ua puta ia mai te opupu mata'i ia patiahia ra, e ua mairi taue i raro, no te mea aore roa o roto.

Te faaite atoa nei oia e, aita a ratou e ravea ia horo i te anapape i taua po ra ia baptizohia i te utuhiraa. Eaha e ore ai ratou e ravea ia horo i te anapape i te hiti o te oire, i te vahi ta Paulo ua baptizo ia Ludia ma i na taime rii i mua a'e? Irava 13-15. Aita paha e peapea ia horo ratou i te anapape, no te mea ua faarue ê na ratou i te fare tapearaa. Irava 30. E e vahi au roa ia te anapape ia horoi atu te tiaï i to raua iravarava, e ia baptizohia oia e to'na fetii atoa i te ravea tia mau, oia hoi i te utuhiraa.—W. A. S.

(Aita i oti.)

Te Parau Tuatapapa no
Iosepha Semita.

(TUATIRAA.)

PENE XII.

MATAHITI 1830.

*Ua roohia Iosepha i te peapea ua rau i te huru. Ua haapao-
hia Iosepha Semita (metua) ana'e ei farii i te mau parau
heheuraa na te ekalesia. Te a'o haereraa o te evanelia
matamua i rotopu i te ati Inidia (Indians).*

A RAVE noa'i Iosepha raua o Ioane Vitima i te ohipa i te
oire ra o Haramoni (Harmony) i te avae Tiurai, 1830,
ua papai mai Olive Taudere te tahi leta no te oire Faete, e
ua faaue oia ia Iosepha, i roto i te i'oa o te Fatu ia faarue ê
atu i te tahi pae o te tahi heheuraa i horoahia ia'na. A
farii mai na Iosepha i taua leta ra, ua ite papu roa oia e, tei
roto ia Satani i te nănă, e ua haavarehia Olive ia'na. E ia pa-
hono atu Iosepha i taua leta ra, ua ani atu oia ia Olive, no hea
mai to'na mana ia faaue mai ia'na ia faarue ê atu i te parau
ta te Atua i parau maira. E muri iti a'era haere'tura Iose-
pha i te oira ra o Faete, e ua farerei oia ia Olive ratou o te
utuafare o Vitima ma, o tei ati mai ia Olive i taua mana'o
no'na ra. Ua haapii atu Iosepha ia ratou i te parau mau, e ua
feruri ihora ratou i taua parau ra, ei reira ua iteahia e ratou i
to ratou hape, e ua tatarahapa ratou e hope roa'e.

A ho'i ai Iosepha i te oire ra o Haramoni, ua tae mai
Nuela Naita e ta'na vahine. Ei reira ua haapao ihora ratou
i te tahi pureraa; hou te haamataraa ua haere Iosepha e hoo
i te uaina ei faatia i te oroa a te Fatu. Ei reira ua fâ mai te
tahi melahi e ua faaue ia'na, eiaha e rave i te uaina ei faatia
i te oroa, maori râ ei mea hamani apîhia e ratou iho. B. F.
S. 26: 1. E mai reira mai inaha noa nei, aore te ekalesia

i rave i te uaina ei faatia i te oroa o te Fatu, maori râ e mea nenei apîhia e ratou iho. Ei taua pureraa ra ua haamauhia o Ema e te vahine a Nuela ei na melo i roto i te ekalesia. Oaoa ihora ratou atoa i reira, no te mea tei ô ratou te Varua o te Fatu.

I te avae Atete ua haere Iosepha Semita, Haeramu Semita, Davida Vitima e Ioane Vitima i te oire Colevile ia haamau i tei baptizohia e Olive Taudere ei melo i roto i te ekalesia. E rave rahi te enemi tei taua vahi ra, no reira ua pure ratou i te Atua ia ore ratou ia iteahia e te enemi, ia oti te ohipa o tei opuahia e ratou. E fatata a'era ratou i te fare no Nuela, ua farerei atu i te enemi, te rave noa ra ratou i te ohipa i niâ i te purumu. E ua haere noa te mau taeae, aore te enemi i ite ia ratou. E i taua po iho â ua haapao ratou i te hoê pureraa, e ua faaoti roa i te ohipa o tei opuahia e ratou. E ia poipoi a'era reva'tura Iosepha ma. E i muri iti a'e i to ratou revaraa, ua tae mai te enemi, e ua haaati ratou i te fare o Nuela, te imi ra ratou ia Iosepha ma e hamani ino. E rave rahi roa ta ratou parau faaino i te feia mo'a i reira. E rave rahi te mau opuaraa iino ia Iosepha i te oire ra o Haramoni. Na te hoê orometua Medoti te reira i faatupu. Ua haavarehia Isaata Hale, te metua hoo-vai tane no Iosepha, e a'na, e ore e tia ia'na ia paruru faahou ia Iosepha.

Muri iti a'e i te taeraa mai o Iosepha no Colevile i Haramoni, ua tae mai Nuela Naita e ua afai atu ia'na ia Faete parahi ai, e tae a'era ua roohia faahou Iosepha i te taiâ rahi o te aau, no te mea te papai ra Haeramu Page i te mau parau heheuraa no nia mai i te tahi ofai huru ê, ei parau na te ekalesia, area e mau parau au ore i te evanelia mai tei papaihia i roto i te bibilia, e te mau heheuraa i horoahia ia Iosepha. Ua haavare-faahou-hia o Olive Taudere e te utuafare Vitima. Taiâ rahi roa te aau o Iosepha. Ua ririhia oia e te mau taata ê e rave rahi i te oire Colevile, i te

oire Haramoni, ua faarue ta'na mau hoa e ta'na mau fetii hoi ia'na, e i te oire ra o Faete te faahapa ra te mau taeae ia'na e te Atua atoa. Ei reira ua ani atu Iosepha ia Olive ia pure raua. Ua faatia oia, e ua pahonohia ta raua pure na roto i te tahi heheuraa faufaa rahi i horoahia ia Olive. Ua parau mai te Atua ia'na aore roa te hoê i haapaohia ei farii i te mau parau heheuraa na te ekalesia, maori râ o Iosepha Semita (metua) ana'e, no te mea tei ia'na te mau taviri no te mau parau aro e te mau heheuraa parau e tae noa'tu i te tau e haapao te Atua i te hoê ei mono ia'na. B. F. S. 27: 2. Ua tia te mau taata parau-tia ia faaterehia, e ia haapiihia e te Varua Maitai, area râ tei te peresideni ana'e te mana ia faaue atu i te ekalesia i roto i te i'oa o te Fatu.

Ua haapao te ekalesia i te tahi amuiraa i te 1 no Setepa, 1830, o tei faaterehia e Iosepha. E ua haapii atu i te parau no te mau heheuraa tei papaihia e Haeramu Page e ua parau atu oia, no ô mai ratou i te diablo. Ua fariihia te reira parau ei parau mau e te amuiraa. E ua faahapa ratou i te reira mau heheuraa, faarue ê atura e ua tatarahaparatonu i to ratou faaroo ore. Ua ninihia mai te varua mo'a i nia iho i te amuiraa, oaoa ana'e ihora ratou, e ua tupu to ratou aroha te tahi i te tahi. Ua tae faahou mai Pare P. Paraita i te oire ra o Faete. Ua baptizo ê na Olive Taudere ia'na, e muri a'e i to'na baptizoraahia, ua afai atu oia i te evanelia i to'na mau fetii i te pae i te hitia o te râ i te tufaa fenua ra o Niu Ioka. Hoê avae i muri a'e i te amuiraa, ua parauhia o Pare P. Paraita, Ziba Petesona, Olive Taudere e o Petero Vitima (tamaiti) e a'o haere i te evanelia i te ati Inidia (Indians). Ua haere atu ratou i te ati Inidia o tei parauhia o Catarugu i te fenua Niu Ioka. Muri a'e haere atura ratou i te oire ra o Ketelani, i Ohaio. Ei reira ua farerei ratou ia Sidine Ritidone, orometua rahi no te haapaoraa o tei parauhia ra o Baptizo Faaapîhia. Ua a'o atu ratou i te evanelia, e ua horoa'tu i te tahi Buka a

Moromona ia'na; ua taiohia e a'na, faaroo a'era oia e, e parau mau, e ua baptizohia ihora, faarue atura i ta'na haa-paoraa, tomo maira i te ekalesia mau. E rave rahi to reira feia ua baptizohia e ua ô mai i roto i te ekalesia. Ua faa-toroahia o Sidine Ritidone e o Limana Uaita e o Federika G. Wiliama i te autahu'araa.

Ua faaea ratou i e fanu pue hebedoma i te oire ra o Ketelani. E i muri a'era haere atura ratou e ua a'o atura i te evanelia i te mau taata e rave rahi, e ia haere noa râ ratou ua roohia ihora i te mau ati ua rau i te huru. Ua a'o atoa'tu ratou i te evanelia i te tahi nunaa ati Inidia o tei parauhia o Wanadoti i te fenua ra o Ohaio. E maoro a'era ua tae roa ratou i te oire ra o Inidipenideni, i Missouri. Mai reira ua haere ratou i te fenua i parauhia o Kansas. E i reira ua a'o atura ratou i te evanelia i te hoê nunaa ê ati Inidia o tei parauhia ra o Delaware, e ua faatupu ratou i te mau haapiiraa evanelia i rotopu ia ratou e tae noa'tu i to ratou tiahi-ê-raahia e te mau taata mana no te hau, o tei haapao ia ratou. Muri a'era ua rave ratou i te ohipa a'oraa evanelia i te mataeinaa i Iaketoni, i Missouri, e i te mau fenua i fatata mai.—VILIAMU SETEMILA.

(E tuatihia mai teie parau.)

Te Faaroo.

(AMAA I. E TIATURI TE FAAROO.)

Eaha te mau mea o tei tiaturihia i te faaroo?

Pahonoraa:

“1. Te faaroo i te mau mea aore i ite-mata-hia.

“2. Te faaroo i te mau mea aore i tupu.

“3. Te faaroo i te upootiaraa o te parau-tia.”

Eaha te faaroo i te mau mea aore i ite-mata-hia?

Pahonoraa: “E tiaturi-papu-raa te faaroo i te mau mea aore i ite-mata-hia. Hebera 11: 1. Te tiaturi nei ta-tou e, e Atua te vai nei i nia i te ra'i, aita rea râ te taata i

hi'o mata'tu ia'na. Ioane 12: 45. Aita rea râ to ô nei taata i ite mata'tu i te fenua Ierusalem, te tiaturi nei râ tatou i te parau a te feia i tae i reira. O taua tiaturiraa ra o te faaroo ia. Te parau nei Paulo e, ua fa maira te Mesia ia'na e ua tuu maira i te tahi mau parau ia'na. Ohipa 9: 5, 6. Aita tatou i ite mata i to'na faraa mai, te tiaturi nei râ i te parau a Paulo, o te faaroo ia te reira. Te parau nei Iosepha Semita e, ua fa maira te Atua e te Tamaiti atoa e ua tuu maira i te tahi mau parau ia'na; o to tatou tiaturi i ta'na parau, o te faaroo ia."

Eaha te faaroo i te mau mea aore i tupu?

Pahonora: "Ua parau maira te Atua ia Aberahama e horoa mai Oia i te tahi fenua ia'na ei a'ia. Ua tiaturi Aberahama i taua parau ra, o te faaroo ia. Hebera 11: 8. Ua parau maira hoi te Atua, e faarahi Oia i to'na ra huaai ia riro mai te mau fetia no te ra'ie te one i tahatai. Ua tiaturi Aberahama i ta'na parau, o te faaroo hoi ia. Genese 15: 5, 6. Te parau mai nei te Atua e, ia haapao tatou i ta'na mau parau e roaa ia tatou te ora muri ore. Mai te mea te tiaturi nei tatou i taua parau ra, ua au ia parauhia tatou ei feia mo'a e te faaroo."

Eaha te faaroo i te upootiaraa o te parau-tia?

Pahonora: "E mana rahi to te ino i roto i teie nei ao. Ua faatataurohia Iesu, te tamaiti a te Atua, ua taparahihia ta'na mau aposetolo, ua parihaavarehia te mau peropheta, ua faainohia te mau tavini a te Atua, ua tahitohitohia te feia mo'a, ua riro te tao'a na te feia haavare, ua manuia te mau ravea rii a te feia opua parau ino, e ua faahanahanahia te taata i rave huna i te hara, no te mea ua rahi ta'na tao'a. Te parau nei râ te Atua e upootia te parau-tia, e faaafarohia te mau mea pi'o, e faateiteihia tei haehaa, e faahaehaahia tei teitei, e haavahia te taata e au i ta'na ohipa, e e faatupuhia te Meleniuma i nia i te fenua nei. Isaia 11: 6-9. O te tiaturi i taua parau ra, o te faaroo ia."

E au mau hoa e, o te taio i teie nei parau no te faaroo, o te amaa 1 teie no te faaroo.—NA RUA.

(E tuatihia mai teie parau.)

Te Mau Parau Api.

I TE 4 no Tiurai ua patia te uira i te tahi fare pureraa rahi Porosetani i Canada, Amerika, e ua ura i te auahi, pau roa ihora. I parauhia e fare pureraa nehenehe roa ia. Teie te hoo no taua fare ra, oia hoi hoê hanere e maha ahuru tausani dara (140,000). Aita e taata o roto i patia-hia'i taua fare ra.

Te vai nei te tahi ma'i pohe i te fenua ra o India, i Asia. E hau Beritani tei taua fenua ra. Ua faaitchia mai te rahi o te mau taata ua pohe roa i reira i roto i na avae e ono i mairi a'enei, oia hoi 650,690. E te pohe noa nei â. Ua tamata noa te hau i te mau ravea ia tinai atu i taua ma'i ino pohe nei, aita râ i manuia.

Ua rave na tamarii na te hoê taata Amerika i te puhipuhi avaava na'na. E ua anoi ratou i ta'na avaava i te paura. E ua vaiihohia ia i to'na vairaa mau. E ia tae mai oia ra, ua rave i te avaava a tuu noa'i i roto i te puhipuhi e ua tutui i te auahi, ei reira ua haruru te paura, parari roa ihora puehu a'era te puhipuhi, e ua ura to'na huruhuru taa e te rouru upoo atoa e ua pau roa, paapaa ino roa oia i te auahi. A hi'o na tatou i te ohipa hauti o te tamarii. Teie te mea maitai, eiaha e puhipuhi i te avaava, ia ore e roohia mai i te ino mai ia'na i te huru.

E avae veavea rahi roa ia te avae ra o Tiurai i mairi a'enei i te fenua Amerika. I parauhia ua pohe roa e 500 e tiahapa taata i te veavea, mai te 1 e tae noa'tu i te 5 no Tiurai i reira. E te faaite atoa mai te vea e, ua tausani i te tausani-raa o tei haaparuparuhia i te veavea. Teie te rahi o tei pohe roa i te veavea i te oire ra o Chicago ana'e i na mahana e pae, oia hoi 201, e 173 ua haaparuparu-noa-hia. E e rave rahi tei pohe roa i te veavea i te oire rahi ra o Boston i te pae hitia o te râ. E i te tahi mau oire aita i navai te pape toetoe e te û puaatoro, te hoê a'e tumu ia i roohia'i ratou i te ino roa.

Teie te moni e au no te korono o te arii apî, o Tihoti, no Beritani, oia hoi e hitu milioni e pae hanere tausani dara (7,500,000). Teie te io'a o te tahi mau ofai tei haamauhia i nia i taua korono ra, oia hoi te daimoni, te saphire, peninima (ruby) e te vai atura te mau mea faufaa rahi roa o tei tuuhia i roto ia'na, e ia oti nehenehe roa ra ei mea hanahana rahi ia. E te korono o Maria, te arii vahine, e mea hamani-apî-hia ia i te palatinuma, te daimoni e te tahi atu â mau mea faufaa rahi. Teie te moni e au no taua korono ra, oia hoi e toru milioni e hitu hanere e pae ahuru tausani dara (3,750,000). Teie te teiaha o te korono no te arii ra, oia hoi e toru paunu e te afa. E to te arii vahine ra, hoê paunu ia e te afa.

Ua hamani-apî-hia nei te tahi pahi auahi o "Imperator" to'na i'oa. I parauhia te pahi rahi teie i te mau pahi o te ao nei. Teie to'na faito, oia hoi hoê hanere e pae ahuru etaeta i te roa. E tia ia'na ia afai na taata e pae tausani e piti hanere e pae ahuru aore (5,250) mai te nehenehe e te peapea ôre.

Tei te oire ra o Moscow, i Rusia, te tahi o'e o tei parauhia te o'e rahi i to te ao atoa nei. Ua hamanihia taua o'e ra i te matahiti 1773. Teie to'na faito, oia hoi 21 avae i te teitei, e e 68 avae ia haaatihia i te pae i raro, e e maha hanere e maha ahuru ma toru tausani e hitu hanere e hitu ahuru ma piti paunu to'na teiaha (443,772).

Manuïa a'era te ohipa tama'i a te mau orure hau i te fenua Mexico, i Amerika. Ua titau ratou e, eiaha Diaz ei peresideni no te hau. E i te mahana 25 no Me, ua faarue atura oia i to'na toroa peresideni. E ao a'era faatoroahia ihora te taata ra o Francisco Leon de la Barra ei mono no'na, e ei peresideni apî no taua repupirita. E tae noa'tu i te taime ia maiti-faahou-hia e te hui raatira te hoê ei peresideni apî no ratou. Muri iho i to'na haamahiti-raa-hia i te toroa peresideni, faarue atura oia i te oire faatere hau no Mexico, haere tia'tura i tahatai, ei reira ua tia i oia i te tahi pahi afai ia'na i te fenua Paniola, i Europa, ei reira oia parahi ai.

I te 30 no Me i mairi a'enei, ua pohe roa te hoê taata, o Tihoti Maledona to'na i'oa. No te oire Fort Smith, i te tufaa fenua rahi ra o Arkansas, i Amerika, oia. Ua taea i te 88 o to'na ra matahiti a pohe atu ai. E taata toroa, ua faatoroahia oia e te hau i te toroa tarî taata. E i mau na oia i taua toroa ra i na matahiti 20, i parauhia ua hau te taata i te rahi, tei tarîhia e a'na i to tei tarîhia e to te tahi ê atu taata toroa no te hau. I roto i na matahiti 20, a haapao ai i to'na ra toroa, ua tarî oia i na taata 88. A haapao noa'i Maledona i to'na toroa i te tufaa fenua rahi ra o Arkansas, tei raro a'e i te reira tufaa, na tufaa fenua rahi ra o Indian Territory e o Oklahoma. E te mau taata hara rahi, no roto mai i taua na tufaa fenua e piti nei, o tei faahapahia e te ture fenua, e o tei faautuahia i te utua pohe, ua tuuhia mai ratou i te rima o Maledona e na'na ratou i tarî. Tai pae atura tei tarîhia e a'na i te raveraa hoê, e hoê â ia e na taata tootoru tei rave-pinepine-hia.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.